

PRIMERA CARTA DEL APOSTOL SAN PEDRO

Pedro ucheē mbesa mondo Jesús quiato ishonda jaaja je

1 ¹Pedro chō se re. Jesucristo chimbaaquiatu chō se re. Aico ā mbesa jēje a. Isho isho jendeco mose jendecua si. Ponto jenda je. Galacia jenda je. Capadocia jenda je. Asia jenda je. Bitinia jenda je. Jē ja je aico ā mbesa a. ²Dios que jēirabo umbaerā nyii jēā mose ra. Espiritu Turā ngue jemii icúe Dios mbaerā cote ra. Jē echeē mumbayā sacuā. Jesucristo ruqui jembitorō sacuā abe jēicua si no. Sā Dios riqui turā i i tuchi jendese. Sā eriqui jembia i i tuchi no.

Dios ra mbae turā mee ja nande je

³Nandechē turā mbei quia Dios riī. Jesu cristo rute quia ae re. Ae que eya eāte riqui nanderese ra. Nyebe nandeisi nguiā mbiasu nguiirina cote. Dios Jesucristo raaque mbuquera mose, aque mose que nandembiasu nande abe ra. Nyebe nandeico nguiā ñee ā. “Dios cheē nda io turā ja nande je”, i ā. ⁴Dios ra nandemingo bei. Eriirīte quia nande re. Nyebe ra mbae mee ja nande je nandeico mose ibate. Mbae icuā ndese ra nandemae eā tuchi aque mose cote. ⁵Jēingo Dios icuate ūquī. Nyebe ae riqui nguiā jendeaquiatu tuchi uquirācuā je co. Dios que mbae mbuquiche ja nande je ra. Nandererao sacuā ibate. Mbae ua ja mose ra nandererao ja ibate cote. Co eriqui raā nguiā nanderaaquiatu co. ⁶Nyebe jēyate riqui nguiā ūquī. Mbae rasi tu mbirī arōte raque jēje. ⁷Sā mbia riqui oro mbuchi no. Equía rirō sacuā esi. Eī ño Dios nguiā jēje co no. Jē Dios icua tuchi sacuā ño mbae rasi riqui re. Nyebe Dios jēicua. Mbae rasi raā naa ndaque. Eturā tuchi chō ūquī oro si re. Oro quia ra ua emo mose. Jē nguia ra jēhua eā mbei Dios icua mose. Jesucristo tu mose nda Dios ñee turā tuchi jenii ña. ⁸Jēingo nyesequate Jesucristo rese ūquī. Jemae eāte raque quia erese ūquī. Jēingo eicuate jēñiangui re ūquī. Jēya tuchite riqui erese ūquī. ⁹Jēingo Jesucristo icuate ūquī. Nyebe ra Dios jēāi mingo turā mbei cote.

¹⁰Sã Dios cheẽ mbuchecuasa ñee cose no. —Mbia ra mae jee Dios turã ndese, i que ñee nda. Nanderĩ ño ngue eriqui nguiã ñee. —Mañi nda Dios quia reae. Uturã je ra mbia mingo bei reae, i que Dios cheẽ mbuchecuasa ndua ndua cose ra. ¹¹Espíritu Turã ngue siqui quia Dios cheẽ mbuchecuasa chiangui re ra. Mbiirandu randu que equia Cristo riĩ nda. —Cristo ra mbae rasi saã tuchi. Aquere ra equirãcuã tuchi mbia rerecua mose ae cote, i que Espíritu Turã Dios cheẽ mbuchecuasa mbiirandu nyii ra. —Manosete ra ùquĩ ndeae. Aba riĩ eriqui “Cristo” i remi, i tuchi que Dios cheẽ mbuchecuasa quia ndua ndua ra.

Dios que jemii icúe umbaerã nda

¹²Dios que embiirandu ra. —Jẽ jëtiamba quiatu ra Cristo mbae rasi saã mbia mingo bei sacua. Jëtiamba quiatu ra Cristo mbae rasi saã mbia namonda je. Mbia emo mosenda je, i que Dios ra. Nanderĩ ño ngue eriqui nguiã “namonda” i. Nyebe mbia riqui nguiã ùquĩ ja renei nenei jëje Cristo riĩ cote. Espíritu Turã abe riqui erenei nenei jëje co cote. Angeles abe ùquĩ icua sete raque quia Cristo riĩ ùquĩ. ¹³Jendua tuchi rã nguia mbae raã nonde. Jëtesa bei quiatu quia. Jesucristo tu mose, eturã tuchi ra ae jëje aque mose. Ùquĩ ndese quia jëingo bei tesa eraarõ. ¹⁴Ae jenyosei chosei quia nyii nae, Dios icuayã mose nyii nae, ùquĩ ndese jëingo ndua eã cote. Dios cheẽ jemumba eã ño nguia cote. ¹⁵Dios quiarei jemingo icúe umbaerã tuchi. Nyebe jëingo turã tuchi ae rã si. ¹⁶Sã Dios cheẽ mbesa ji riqui no: —Jëturã ño jëingo se rã si, i ñi embesa ji re. ¹⁷Ùquĩ jëingo “Paba” i Dios je ùquĩ. Nyebe jëingo ireĩ ireĩ jiri esi jëingo mose íbii. Dios ra mae nandechiao ja ja rese. Emo chiao rese ra mae eã eã. ¹⁸Nandei ñiinda que siqui chooño nguia cose ra. Dios rese siqui rocoĩ. Eĩ nande que equia nande abe nyii no nda. Dios que nanderirõ ùquĩ si cote ra. Dios que mbae isiquia mondo eã nanderirõ sacua nandeicua si ra. Oro que emondo eã no nda. Plata abe no. ¹⁹Cristo ruqui quiatu ngue nanderirõ nguiã nandeicua si. Aba queteamba tuchi chõ Cristo ruqui re. Cristo mano mose nande je que eruqui uchẽ tuchi ra. Sã sacerdote oveja turã ño iquia no. ²⁰—Cristo ra mano mbia icua ndiquicharõ, i que Dios nyii mbae ao nonde ra. Namõ ño ùquĩ io nguia jëje cote. Namõ ño Cristo mano nguia jëje cote. ²¹Cristo chõ Dios icua uquia nguia jëje ùquĩ. Dios chõ ngue Cristo raaque mbuquera nguia. Dios chõ uquirãcuã mee nguia Cristo je. Nyebe jëingo nguia Dios icua ùquĩ cote. Nyebe jëingo nguia ñee. “Dios ra nandemingo bei ibate” i ùquĩ.

²²Dios cheẽ jëisi turã mingo ùquĩ cote. Nyebe jeñia mbitirõ nguia mbushĩ cote. Nyebe jëingo nguia nyesecua arõte mbia rese cote. Jenyesecua tuchi quiatu quia jenyiese jë. Nandechiangui re chõ nandeico nyesecua tuchi mbia rese jë. ²³Nyaacuquia si je raanguia chõ jë cote re. Nandechaacuquia que equia nyii nae, mbia chõ ngue nanderu nyii

ra. Nandechaacuquia sire, Dios que nanderu tuchi cote ra. Dios cheẽ ño nandembuchaacuquia si nguiã. Echeẽ nda ua eã bei. Siqui bei rae. ²⁴Sã embesa ji riqui ñee no:

Quiata rã tuchi chõ mbia ja riqui nguiã ã.

Sã quiata riqui mano jeite no.

Quiata uti rã ño mbia riqui nguiã ã no.

Eturã mbirĩ ño chĩ ndaque nyii.

Aquere chõ ñimama cote. Mano cote.

²⁵Dios cheẽ nguiã ra ua eã mbei,

i que embesa ji ra. Dios cheẽ sí chõ ngue jeñandu nguiã Jesucristo riĩ. Jemingo bei sacuã.

Jëo tuchi chõ nguiã Dios cheẽ ndese

2 ¹Nyebe jëhui mbae icuã ja si. Jë nda mbia jembirĩ irĩchĩ nguiã jë. Jenguasu ra jësaã saãchĩ. Emo mbae ra jenyosei choseichĩ nguiã jë. Jeñee icuã icuãchĩ nda equia emo nii jë. ²Sã àquẽ itàqueĩ ndiqui uchũ achã asite no. Eĩ jenyẽ bei chõ nguiã oo Dios cheẽ ndese. Eĩ nda jëquirãcuã tuchi riqui Dios rese. Sã àquẽ quirãcuã ndiqui quiambure no. ³Dios turã ngue jësaã ndei resẽ.

Síta turã na ño Cristo re

⁴Jesucristo ra siqui bei. Jesucristo rei sita turã na. Sã mbia riqui sita mo ndirirõ no. Eĩ si chõ mbia nguiã Jesucristo ririrõ ndei ã. Dios queteamba tuchi quiatu Jesucristo re. Dios chiirabo tuchi chõ ae re. Jesucristo jësiichã i i tuchi quiatu quia jë. ⁵Síta turã na ño jëingo nguiã jë abe ùquĩ. Sã Dios chuchua ao ji sita turã je no. Dios chuchua ao ji rã ño jë no nde. Jeñee turã mbei quiatu quia Dios je. Jë sí chõ jendete jemondo quia ee. Jëingo bei quiatu quia icúe embaerã. Ûquĩ mose ra Dios jëisi turã mbei Jesucristo riĩ cote. ⁶Nyebe Dios cheẽ mbesa ji riqui nguiã ñee:

Jesucristo ra amii Zión.

Tuchua i turã na tuchi chõ Jesucristo re.

Sechiirabo tuchi chõ ae re.

Aba queteamba tuchi chõ ae re.

Ae Jesucristo icuate quia nae, ùquĩ mo nda ñee eã.

“Jesucristo rui aico jirichĩ co”, iã nda emo,

i que embesa ji ra. ⁷Sã mbia mo tuchua ao sita turã je no. Ûquĩ sita turã na ño Jesucristo riqui nguiã co. Ûquĩ jëingo Jesucristo icuate ùquĩ. Nyebe jengueteamba tuchi ae riqui nguiã co. Ae Jesucristo icua eãte quia nae, ùquĩ je ra embesa ji cheẽ io tuchi cote. Æ ndei embesa ji cheẽ ã:

Ae tuchua aosa quirirõ sita nae, aque quia ra tuchua i turã tuchi cote,

i que embesa ji ra. ⁸Sã embesa ji riqui ñee no:

Sã sita riqui pãtã i emo cúi je no jẽ.
 Embucoi no jẽ,
 i que embesa ji ra. Eĩ si chõ nda mbia pãtã i raanguia Jesucristo cheẽ je.
 Jesucristo cheẽ mumbayã sereãte quia ñene. “Echeẽ mumbasa ra pãtã i
 raanguia”, i que Dios ñiinda mosenda bei ra.

Dios mbaerã tuchi chõ jẽ nde

⁹Dios que jẽirabo umbaerã tuchi ra. Sacerdotes rã ño jẽingo nguiã Dios
 je ùquĩ. Dios que jemingo icúe umbaerã nda. Jẽ mbia mbiirandu randu
 bei sacua Dios chiao turã nii. Ae quiatu que jendirõ itondaru si ra. Jẽingo
 sacua nyaashĩ Dios rese cote. ¹⁰Mbia chibutereãte que jẽ nyii ra. Dios
 quiato tuchi chõ namo jẽ cote re. Emo ngue ndua eãte quia jendese nyii
 ra. Dios quia ndua tuchi nguiã jendese co cote.

Dios rimba chõ jẽ nde; nyebe jẽingo turã

¹¹Achesequa tuchite quia jendese co. Isho ishote jẽingo jendecua si
 ùquĩ. Ae mbia chosei chosei quia mbae icua nae, ùquĩ ndese ra jemae
 maechĩ. Eicuãte riqui nandeaĩ je ùquĩ. ¹²Ae Dios icua eãte quia nae, ùquĩ
 ndésaa jẽingo turã ño nguia. Ùquĩ ndiqui ñee icua icuate raque jeniĩ ùquĩ.
 Jẽicua mose rocoĩ. Ùquĩ nda mae jee jeturã ndese. Ñee turã jee ra Dios
 riĩ, Jesús tu mose.

¹³Mbia rerecua ja cheẽ jemumbayã ño nguia Dios je. Ae ererecua tuchi
 ererecua ja si nae, aque cheẽ abe jemumbayã ño nguia no. ¹⁴Sã ererecua
 tuchi riqui mbia rerecuarã miĩ jaaja no. Mbia icua mbasi mbasi sacua.
 Mbia turã ndequiatu sacua abe no. Ùquĩ ñee abe jemumbayã ño nguia
 no. ¹⁵Jẽingo turã ño nguia jẽ. Jẽingo turã mose ra mbia aquiatuã ñee
 icua aroneate jẽje. Dios bite ùquĩ. ¹⁶Jesucristo que jembui mbae ja si cote
 ra. Jenderecua eãte raque mbae mo cote. —Mbae icua tasaã. Sererecua
 eãte rei ñene, jenyechĩ ndae. Dios rimba chõ jẽingo. ¹⁷Jẽingo turã ño
 nguia mbia ja je. Jenyesequa chõ nguia jendesenda Jesús quiato rese.
 Jẽireĩ ireĩ jiri Dios si. Mbia rerecua cheẽ nda jemumba mumbachĩ jẽ.

Cristo rã si chõ jẽingo ñimbirãcuã turã mbae rasi je

¹⁸Mbia rimba je tacheẽ cote. Jenderecua cheẽ jemumbayã ño nguia
 jẽ. Jẽireĩ ireĩ jiri quia esi jẽ. Jenderecua icua mose abe chõ echeẽ
 jemumbayã nguia. “Jenderecua turã mose achõ ño echeẽ jemumbayã”,
 ae eã nguiã jẽje co. ¹⁹Mbia icua icua ñooño mose nande je, nanderoseĩ
 nguiátu chõ nandeico. Dios bite ùquĩ. Dios riĩ nanderoseĩ nguiátu mose,
 ebite ùquĩ. ²⁰Mbae turã jesaã saã mbei chõ nguia. Mbia jẽirua nua
 mose jeturã nii, jendoseĩ nguiátu chõ jẽingo. Ùquĩ mose ra Dios ia tuchi
 jendese. Mbae icua mo nda jesaachĩ. Jẽ mbae icua naa mose, Dios biãte
 ùquĩ. Mbia jẽirua nua mose jẽicua nii, jendoseĩ nguiátu raque rae, Dios

biâte ũquĩ. Jêicuã niĩ ño ñene. ²¹Nyebe Dios “jêingo serui”, i nguiã nande je. Sã Cristo roseĩ nguiátu tuchi mbae rasi raã mose nande je no. Nande abe nanderoseĩ nguiátu sacuaã eraã si. ²²Cristo que mbae icuaã mo saã eã tuchi ra. Mbia mo ngue embiĩrĩ iriã tuchi quia ra. ²³Mbia ñee icuaã mose Cristo je, ae que ñee icuaã eã mbei mbia cheẽ ndibishorõ nda. Mbia Cristo mbaasi asi mose, “tasaã se”, iã tuchi que equia ra. “Dios quiarei”, i chõ ngue equia ra. ²⁴Jesús mano mose ira mbuchicuandasa ji rese, nandeicuã ndiquicharõ ño ngue mano nguiã. Eraaque rã nandeico sacuaã mbae icuaã je chõ ngue re. Nandeico sacuaã mbae turã ndese chõ ngue re. Cristo mbae rasi raã mose, jembitirõ sacuaã ño ũquĩ nde. ²⁵Ovejas quiachã je rã ño ngue jêingo nguiã nyii. Jenyebi que oso ngasẽ Cristo rea cote ra. Ovejas raarõsa rã ño ae riqui nguiã jêje co cote. Ae chõ jendeaquiату nguiã co.

Jendu cheẽ jemumbayã ño nguia, i cuña je

3 ¹Mbia ninisi je tacheẽ cote. Jendu cheẽ nda jemumbachĩ jê. Jesús quiatoã ndaque jendu. Echeẽ jemumbayã ño. Jendu nda Jesús icua chee cote chã. Jêingo turã mose ee. Jê Jesús cheẽ nenei neneinde rocoĩ ee. Jesús nda eicua cote chã. ²Jêingo turã ndese ra jendu mae nyee. Echeẽ jemumbayã mose. ³—Mbae je nda serete ambarõ na ña, jenyechĩ nda ndua ndua jê. Jêo resenda rese. Jêhui rese abe no. Tiru turã ndese abe no. Jêa uma ji turã ndese abe no. Ũquĩ miĩ ndese chõ nda jêingochĩ ndua beite jê. ⁴Jeñiangui re quiату jêingo turã. Jêingo tochi chõ nguia. Ī nda jêturã ua eã mbei jêsi. Ũquĩ nguiату Dios bite re. ⁵Sã cuña mo no. Dios quiato cose no. Ũquĩ nguiату que eturãte riqui uchiangui re quiату ra. Ngu cheẽ abe mumbayã no. Ndua rocoĩ nguete resenda umbarõsa rese. ⁶Sã Sara Abraham ñee mumbayã no. Sererecua i ee. Jêingo turã mose, Sara rã nda jê cote. Mbae mo si ra jêsiquichechĩ cote jê.

Jêingo turã ño nguia jeninisi je

⁷Tacheẽ eninisi rerecua je cote. Jêaquiату chõ jêingo turã jeninisi je. Jeninisi jemingo turã. Jêingo tochi chõ nguia ee. Jê nguia jeãtã jiri esi re. Dios quia eturãte jê ja je re. Jeninisi rese. Dios que jendeco mingo nyiese ra. Jeninisi rese. Nyebe jêingo nguiã siqui turã jeninisi je. Ũquĩ mose ra Dios jeñee andu bei, jeñee mose ee.

Mbia icuaã icuaã mose jêje jêturã mose, jêya chõ jêingo

⁸Jêingo turã ja chõ nguia jenyue no. Jêya eã jiri jêingo jenyiese no. Hue rĩ ja chõ jêingo ndua ja. Jenyesequa ja chõ nguia nyiese. Jêseteã ño jêingo nyue. ⁹Mbia icuaã mose jêje, jêicuachĩ nda jê abe ee. Mbia ñee icuaã mose jêje, jeñee icuachĩ nda jê abe ee. Jeñee turã nguiату quia ee jê. Jêingo serui, i chõ ngue Dios jêje re. Dios ñee turã mbei sacuaã jeniĩ ño ngue re. ¹⁰Sã embesa ji riqui ñee no:

Jëingo turãse mose, jeñee icuã eã emo nii.

Jëingo chooño sereã mose, jeñee ñooño eã emo je no.

¹¹ Jenyicuasẽ ño nguia mbae icuã si.

Mbae turã ño jësaã nguia.

Jëturã ño nguia mbia ja je jẽ.

¹² Ae siqui turã nguia nae, ùquĩ Dios teaquiату bei quia co.

Ùquĩ ñee Dios chandu turã mbei quia co.

Ae siqui quia mbae icuã ndese nae, Dios biã tuchi chõ ùquĩ nde, i que embesa ji ra.

¹³ Jëingo turã mose ìmañi nda emo mbae icuã naa jëje re? ¹⁴ Mbia icuã icuã mose jëje mbae turã naa mose, jëya tuchi chõ ùquĩ mose re. —Mbae icuã nda asaã ndeje jẽ, i mose jëje, jësiquicheã ño esi. ¹⁵ Jesucristo jemingo tuchi chõ nguia jeñiangui re jenderecuarã. Emo ñee mose jëje, jeñee aquiату chõ ee. —ìMbaerã ereico Jesucristo rese re? i mose emo jëje, jeñee aquiату chõ ee. Jëingo mingue chõ ee. ¹⁶ Jëingo turã mbei. Diosbi rese jëingo bei. Ì nda jëya bei riqui. Ì nda “mbae turã asaã eã ñochĩ”, jeny eã. Ae ñee icuã icuã nguia jeni nae, ùquĩ nda ireĩ ireite quia ucheẽ icuã si cote. Ireĩ ireĩ nda jëingo turã mose Cristo rese. ¹⁷ Mbae rasi jësaã mose jëturã nii, ùquĩ nguiarei Diosbi tuchi. Mbae rasi jësaã mose jëicuã nii, ùquĩ nguiarei Dios biã tuchi. Mbae icuã niite quia ñene. ¹⁸ Cristo abe que mbae rasi saã nande je ra. Mbae icuã naande rocoĩ. Ae raque eturã. Mbae rasi que esaã nandeicuã ndiquicharõ nda. Nandemingo sacuã Dios rese. Cristo rete que mano nda. Espiritu Turã ngue embuquera si ra. ¹⁹ Aque mose que Cristo si Dios cheẽ nenei nenei mbia aĩ tarõ ji je ra. ²⁰ Ùquĩ ngue Dios cheẽ mumba mumba quia nyii ra. Noé Dios cheẽ nenei nenei mose ee. Dios roseĩ nguiátu tuchi que eriqui mbia riisu isu aque mose ra. Noé siqui bei mose arca raã naa. Aquere que mbia miite ique arca ye ra. Ocho que mbia ra. Siqui bei sacuã ama ndicuasú mose. ²¹ Sã ama Noé mumbebi mingo no. Eĩ si chõ bautismo co no. Nandei mbuchasu mose, aque quia ra nandemingo eã Dios rese. Nandechiã mbitirõ ji mose, aque mose quia ra Dios nandemingo bei cote. Bautismo tuchi chõ ùquĩ nde. ²² Jesucristo quera sire que esi ibate ra. Hue eriqui beite Dios jii hue cote. Mbae ja rerecuá tuchi chõ ae cote re. Angeles rerecuá. Ibatenda rerecuá ja.

Mbae jësaã turã ja

4 ¹ Sã Cristo mbae rasi saã tuchi siqui mose íbii no. Eĩ jeny e si chõ nguia ñimbiracuã nguiátu mbae rasi raã mose. Ae mbae rasi saã tuchi quia nae, ùquĩ nda mbae icuã saã eã mbei cote. ² Ae Dios bite nae, ùquĩ ndese ra eriqui bei cote. Ae echoseite quia nae, ùquĩ naa ndocoĩ. ³ Mbia ataque rã tuchi que nandeico nyii ra. Nandeicuã tuchite que eriqui nyii ra. Ae nandehosei quia nae, ùquĩ ndese achõ ño ngue nandeico nyii

ra. Nandequiacua quiacua que equia nyii ra. Nandechimbusarei chooño mbei que equia nyii ra. Dios abareã ndese que nandeico ndua tuchi nyii ra. Huee chõ cote. Nandehui que ùquĩ ja si cote ra. 4—¿Mbaerã jëingo bei eã mbae icuã naa naa urerese re? i nanderesenda ñiinda quia nande je ã. Nyebe eriqui nguiã ñee icuã icuãte nande je ã. 5—¿Mbaerã ùquĩ jësaã nde? i chee ra Dios ùquĩ je cote. Dios mae mose mbia chisaã saã ja rese. Aque mose ra Dios mbia mano je abe chisaã ndea ja. Mbia reco abe chisaã ndea ja. 6Ae mano mbia nyii nae, ùquĩ je que Jesucristo Dios cheẽ nenei nenei nda. Eaĩ siqui turã sacua Dios rã si. Erete mano ndaque huiicuã je.

7Achite mbae ñi ua ja a cote. Nyebe jëingo mbae turã naa naa ja bei. Nyebe jëingo ñee ñee mbei Dios je. 8Jenyesequa tuchi quiatu quia jenyiese. Ùquĩ mose ra jëtesarei jenongue icuã si. 9Jenongue jëisi turã ño nguia nyoĩ mose jenyuchua. Jëya chõ jëingo eisi mose. 10Dios que nandechisaã saana mee nande ae ae je ra. Ùquĩ jësaã turã turã ño nguia jëataque je. Dios uquiato mee mose jëje mbae mo naa sacua, ùquĩ jësaã turã turã ño nguia jëataque je. 11Emo Dios cheẽ nenei nenei mose, sã Dios cheẽ tuchi chõ esenei senei nguia. Jemo mbae turã naa naa mose uataque je, sã eriqui eraã turã Dios quiracuã ñi. Ae jësaã saã nguia mbae nae, Dios je chõ jësaã. Ì nda mbia ñee turã mbei Dios riĩ. Jesucristo riĩ abe no. Sã mbia ñee turã mbei Dios riĩ. Amén.

Mbae icuã tuutu mose jëje, jëya cho jëingo

12Mbae icuã tuutu mose jëje, “¿mbaerã eriqui seje re?” jenyechĩ nda nyuruirate, Seresenda. Eĩ mbei chõ mbae icuã nguiã tuutu Jesús quiato je. 13Mbae icuã tuutu mose jëje, jëya chõ jëingo. “Cristo rã si chõ nandeico nguiã mbae rasi raã”, jenyechõ nguia ñimbia. Cristo nininya tu mose, aque mose abe nda jëya tuchi chã. 14Mbia ñee icuã icuã mose jëje Cristo riĩ, coche ñene. Jëya chõ jëingo. Espíritu Turã ño jëichu ichu nguiã ùquĩ. 15Mbia jembaasi asi chooño mose Cristo riĩ, jëya chõ jëingo. Jëicuã ñi mbia jembaasi asi mose, ùquĩ nguiatu aba ireĩte re. Jë mbia mo iquia mose. Jë mbae mo mbuquiachã mose. Jë mbia mo mbupaama i mose. Jë ùquĩ icuã mo naa mose, aba ireĩte ùquĩ. 16Mbia jembaasi asi mose Cristo riĩ, jëireĩ ireĩchĩ nda ùquĩ mose. Cristo resendate quia jë nde. Nyebe jëya chõ jëingo. 17Dios ra mae ja chee mbia chisaã ja rese. Achite Dios ñi mae uquiato chisaã ndese a. Nandechisaã ndese chee ra Dios mae. Uquiato chisaã ndese chee. Mañi nda uquiatoã nyisaã je remi. Ùquĩ nguiatu ra embasi tuchi nandesi quiatu. Dios cheẽ turã nguiatu ngue eisiachĩ nguiã. 18Dios quiato riqui ñimbiracuãyã arõ arõte mbae icuã tuutu bei mose ee ã. Dios quiatote raque. Dios quiatoã nguiatu ra ñimbiracuãyã tuchi mbae icuã si. Dios ra emondo chee tata cuasu. 19“Mbae rasi jësaã”, i mose Dios nande je, nandesã turã ño nguia ee. Mbae turã nandesã i i chõ nguia ee. Nandereco nandeme tuchi nandeaosa Dios je. Ae ra ucheẽ mbuchebiã mbei nande je.

Jesús quiato jêteaquiato turã ño nguia

5 ¹Jeñimunua je rerecua ja je tacheẽ cote. Cristo quiato rerecua chõ se no nde. Cristo mbae rasi raã ndese que amae se ra. Cristo nininya nyecua mose, se abe ra aico bei erese cote. ²Ae Jesús quiato siqui quia jendese nae, ũquĩ jêteaquiato turã nguia. Sã ovejas raarõsa riqui ovejas raarõ turã no. Eĩ jenyue chõ nguia Jesús quiato raarõ. Jêteaã teã eã ño nguia mbia mbaaquiato quiatu. Jendua ndua eã ño nguia mbae isiquia rese. ³Jêingo tochi chõ nguia Jesús quiato chimunua nua je. Mbiacha ra jêsaã saã techĩ ee jê. Jêingo turã ño nguia eresa rae. Ĩ nda jê na sí eriqui. ⁴Jesucristo quiarei mbia reaquiatusa tuchi nande si. Ae tu mose, mbae turã tuchi mo nda emee jêje premio. Ũquĩ nda ua eã mbei. ⁵Acuanindu je tacheẽ cote. Amei ñee jemumbayã ño nguia jê. Jê ja jêataque cheẽ jemumbayã ño nguia jê. Jêingo tochi ja chõ nguia jenyue jê. Sã embesa ji riqui ñee no:

Ae ucuasu saã saã nguia nae, Dios biã tuchi chõ ũquĩ nde.

Ae siqui tochi quia nae, ũquĩ je quiatu ra Dios turã mbei riqui, i que embesa ji ra.

⁶Jêingo tochi chõ nguia Dios je jê. Equirãcuã tuchi chõ ae re. Ae ra mbia mumae turã nyee jendese emo mose cote. ⁷Jendua ndua ia eã si jêhui chõ. Jemee ño Dios je. Ae riqui ndua beite jendese co. Jendeaquiato beite quia co. ⁸Jeñimbaaracua chõ nguia jê. Jêtesa bei chõ nguia jê. Aba checuayã nderecua riqui ngata beite co jê. “Mbia tambiiçuã içuã”, i beite equia co. Sã nyacua no. Sã nyacua risha riqui ureĩ mbocheite “mbae tau” i no. ⁹Aba checuayã nderecua jêsiquisã ño nguia jenyese. Dios jêicua tuchi chõ nguia jeñiangui re. Sã jendesenda ishonda ja riqui mbae rasi raã tuchi no. Jê na si no. ¹⁰Sã Dios turãte riqui nande je no. Mbae rasi ra jêsaã ndaque nyii. Aquere ra Dios jembitorõ cote. Jembirãcuã tuchi cote. Dios sí chõ ngue ñee nguia nande je. “Taemingo bei serese ibate Jesucristo riĩ”, i nguia nande je. ¹¹Dios quiarei equirãcuã mbei. Eeturã mbei. Amén.

Pedro ñee hui bei sacua cote

¹²Co ambesa quia jêje co. Jemingo i i sacua Dios rese. Jembaaquiato sacua Dios turã nii. Jêingo bei chõ nguia erese. Co ambesa mondo quia jêje aque. Silvano ndese aque. Jesús quiato turã tuchi chõ Silvano nde. Nanderesenda re. ¹³Jesús quiato Babilonia jenda saludos mondo quia jêje aque. Dios chiirabo chõ ã nde. Jê na si. Marcos abe saludos mondo quia jêje aque no. Seririĩ na ño aico nguia ee co. ¹⁴Saludar jenyue turã turã ño jenyue mambi. Jenongue ritii abe jêsiite ite chõ nguia mambi. Jesucristo quiato jate quia jê nde. Sã jêya beite riqui. Amén.